

Informasjon om hjort-, elg- og rådyrjakta – Lærdal 2025

Dette skrivet vert sendt ut elektronisk til valda, i tillegg til at det vert lagt ut på heimesida til landbrukskontoret. Det er viktig at de som er valdansvarlege vidaresendar til alle grunneigarar og jegerar i valdet dykkar. Når alle får same informasjon, er det enklare å samarbeida:-) Om det er noko de lurar på, er det berre å ta kontakt!

Det er spanande tider i høve skrantesjuka no. Ei arbeidsgruppe skal i november levera ein plan for reetablering av villrein i Nordfjella sone 1. Inntil vidare er det ikkje endringar i høve oppmodinga om høgt uttak av hjort og elg og prøvetaking for skrantesjuka. Nordfjella sone 1 er framleis i den sokalla brakkleggingsperioden og signala til heile regionen er framleis å halda bestandane låge og ha fokus på prøvetaking av jakta vilt og fallvilt.

Naudsynt info knytt til jakta er samla punktvis under:

Kvote

Gjeldande bestandsplan for hjort i Lærdal er for perioden 2023-25. Det er altså siste året i bestandsplanen denne sesongen. Planlagde fellingar har eit etterslep på om lag 150 hjort. Dette, saman med at både sett-hjort-indeksane og vårteljingane tydar på ein auke i bestanden, gjer at det er teke nokre grep for å auke avskytinga i 2025. Valda som er medlem i Lærdal bestandsplanområde for hjort, kan nytta alle dei ubrukte fellingsløyva frå 2024 i tillegg til 2025-løyva denne sesongen. Det er fri kvote på hjortekalv til alle grunneigarar i medlemsvalda i 2025/26. Valda som ikkje er medlem kan kunn nytta dei tildelte fellingsløyva i 2025 – og har ikkje fri kvote på kalv.

Det vert såleis delt ut 82 fellingsløyve til valda utan bestandsplan. Valda med godkjend bestandsplan får utdelt 473 fellingsløyve, i tillegg til dei ubrukte 213 løyva frå 2024. Totalt er det då 768 fellingsløyve + fri kalv til medlemsvalda tilgjengeleg i 2025.

For elg vert det delt ut 55 fellingsløyve. For rådyr er det 1 fellingsløyve.

Det er søkt om nokre valdendringar i kommunen, og alle desse er ikkje handsama ferdig endå. Dette vil skje så fort landbrukskontoret får naudsynt hjelp med teikning av karta. Løyva til desse valda vert sendt ut så fort som råd og kjem i tillegg til dei nemnte løyva.

Gjeldande bestandsplan kan de finna her:

<https://www.laerdal.kommune.no/bestandsplanomraade.597229.nn.html>

Sjå vedlegga for fordeling til dei ulike valda.

Jakttid

Forskrift om utvida jakttid kring Nordfjella og Hardangervidda gjekk ut i januar 2025. Miljødirektoratet har høyring på ny forskrift ute, med frist for uttale 16. juni 2025. Info om kva som vert konklusjonen der vert sendt ut når dette vert bestemt. Felles landbrukskontor har sendt inn uttale, i samarbeid med bestandsplanområda i Årdal, Lærdal og Aurland.

Jakttida for rådyr er delt:

- Vaksen rådyrbukk: 10. august-23. desember
- Anna rådyr: 25. september-23. desember.

CWD –prøvetaking

Vaksen hjort og elg skal prøvetakast av jegerane. Prøveresultata er viktige for vegen vidare. Info og utlevering av prøvemateriell skjer på jegermøte i august og i kassa ved teknisk på Bergo/ved brannstasjonen.

All generell informasjon om CWD er samla på: <https://www.hjortevilt.no/>

Kjeveinnsamling

Det er IKKJE kjeveinnsamling i Lærdal denne sesongen.

Jegermøte

Me planlegg å ha jegermøte i Lærdal før jaktstart i august. Meir info om tid og stad kjem seinare.

Helikopter

Statens naturoppsyn tilbyr IKKJE helikoptertransport av slakt denne sesongen. Eventuell utflyging må organiserast privat.

Sal av slakt

Når det skal fellast mykje hjort, kan det kanskje vera trong for å selja unna eit slakt eller to. Haugen gardsmat i Flåm v/Odd Ohnstad kjøper slakt. Sjå

<https://www.haugengardsmat.no/jegerinfo>

Telefonnummeret til Odd er 915 39026.

Sett-og-skutt

All jakting skal registrerast på Hjorteviltregisteret. Det er viktig også å registrera jaktdagane utan felling eller observerte dyr. Registreringane gjerast anten ved å logga deg inn på www.hjorteviltregisteret.no eller ved å lasta ned settogskutt-appen. Det er viktig at jegerane registrerer jaktinga si fortløpande, då har me oversikt over korleis fellingane ligg an underveg i jakta.

Prøvesvaret finn de på hjorteviltregisteret under «Helse»-fana i Hjorteviltregisteret. I 2018 vart det gjort nokre endringar på korleis jegerane skulle registrera jaktinga si på settogskutt. I korte trekk var endringa den at alle observerte dyr skulle registrerast, uavhengig av om dyret med sikkerheit var sett fleire gonger/av andre. Me trur ikkje mange fekk med seg denne endringa, fordi det ikkje var godt marknadsført. I tida no er sett-hjort-registreringane viktigare enn nokon gong fordi me på den måten kan følgja med på endringane i bestanden opp i mot målet om reduksjon. Ei endring i måten å føra på er difor uheldig fordi det vert vanskelegare å samanlikna tala mellom åra. Difor har me beslutta at me IKKJE VIL FØLGJA endringa som det er lagt opp til i føring av sett-hjort. Alle jegerar i Årdal skal altså føra sett-hjort som før, og ikkje ta omsyn til endra instruks! Ergo, registrer sett-hjort som «vanleg»!

Human jakt

Sjølvs om det er ønskeleg med høgt fellingsresultat, er det viktig at de tenkjer sikkerheit og human jakt når de er ute. Skyt kalven før kolla. Hugs plikten til å ha tilgang på ettersøkshund –og bruk hunden når uhellet er ute! Her har me ein del å gå på! Viltforvaltinga oppmodar Statens Naturoppsyn til å føra kontroll med human hjorteviltjakt også denne sesongen.

Samarbeid

Dei valda som er medlem i bestandsplanområdet har moglegheit til å flytta løyve mellom valda, og mellom åra i bestandsplanperioden. Det er bestemt at medlemsvalda kan nytta alle ubrukte fellingsløyve for hjort frå 2024 til 2025. Alle fellingane skal meldast inn i fellingsrapporten det året dei er felt. For å flytta løyve mellom vald som er medlem i bestandsplanområdet, må valda ha ei skriftleg avtale om samjakt. Ta kontakt om du ønskjer eit ferdig formular på dette. Det valdet som får fellingsløyvet tildelt, skal rapportera resultatet, uavhengig av om løyve er nytta på eit anna vald. På settogskutt registrerer jegerane fellinga på det valdet som dyret vart jakta på. Fellingsavgifta vert fakturert valdet som fekk løyvet. Det som truleg vil vera begrensande for jaktuttaket til hausten er jegeranes tilgjengelege tid til å jakta. Dei valda som «føler seg ferdig» med å jakta i løpet av hausten og som har mykje dyr i terrenget, bør vurderer om dei kan slippa fleire jegerar inn i terrenget. Dette kan gjerast anten ved at jegerar har med «eigne fellingsløyve» eller at fleire jegerar kan koma inn og jakta på dei løyva som er gitt det aktuelle valdet. Dei merka hjortane fortel oss at dyra nyttar mange vald i løpet av året. Dei dyra som ein kanskje opplever som «eigne dyr», flytter seg oftast mykje, både i løpet av døgeret og sesongen.

Fellingsavgift

Fellingsavgift:	2025
Hjort $\geq$ 1,5 år	480
Hjort kalv	0
Elg $\geq$ 1,5 år	620
Elg kalv	0

Rapportering

Frist for rapportering til kommunen er 14 dagar etter endt jakttid. Valdansvarleg skal gjera dette i hjorteviltregisteret. Me hjelper gjerne til om de har trong for assistanse!

Skitt jakt!